

天一閣集

天一閣集卷之六

四明范欽安卿 著

過汪世明

寂歷空山裏招携勝地過
林迴花樹嬾亭靜水雲多
君已風流劇吾如汗漫何
夜闌燒短燭尊酒聽高歌

紅菊

院靜霜風杳深冬菊尚華
輕枝搖晚日密葉闌春霞
的的臨丹牖盈盈出絳紗
祇憐傾國甚妬殺洛陽花

雪中簡王惟和

寂寞梁園客迂迴剡曲家
一冬初破雪萬里正飛花

帶雨斜侵慢迴風曲抱沙相看如不醉辜負此年華
登天封塔

化塔城中起冬晴縱一躋孤高盤斗極宛轉上天梯
飛鳥燕山北游雲楚水西白毫長似畫何處有人迷
送朱千戶

星劍紫貂裘金鞭控玉駟言承五校選獨上九霄遊
出塞胡霜淨臨關漢月浮功成期報主不爲博封侯
遊湖南諸山作

登覽紆真興山巔復水涯就僧談聖果對客飯胡麻
青採春前柳紅霑雪裏花向來游歷慣何地不爲家

金峨寺次王定齋韻二首

古寺攬奇遊霜林萬籟秋
禪心燈寂寂客興水悠悠
候月時窺澗看山直上樓
獨矜幽賞洽不減曲江頭
共誇兜率境山水擅南州
古壑烟霞積虛堂鐘磬幽
草逢江外歇雲見海東流
真果從今得歸依自可留

護聖寺

久慕祇園勝衝寒縱遠尋
嶺梅爭歲色谷鳥變春音
已脫區中縛猶清物外心
法高寧用護趺坐夜堂深

寺中

淨地湧金蓮堂開會梵筵
香燈懸上界法雨下諸天

有悟初離妄無言即詣禪詎須乘寶筏沿邇向迷川
值雪阻往館江

香閣過逢地留尊坐不譁偶逢一夜雪如對萬山花
浙浙含風細輝輝裊霧斜心期同訪戴惆悵暮天槎
懷王子長

何處王摩詰登遊興獨慳睹棊留別墅把酒限空山
日月銷沉裏乾坤俯仰間漫將今夜興辜負雪舟還
寶慶寺

寶地鬱嵯峨談玄竟日過四山圍水竹一徑引烟蘿
把帙軒窓靜鈎簾月露多不禁清賞劇中夜發長

寺中對月

雲罷逢華月空門勝可憐
蒼蒼移極海脉脉近中天
影傍龍宮靜心隨鴈塔懸
願憑開士力長對法輪圓

金文寺趨金峨

野寺崇山畔登攀隔歲期
寒烟餘古塔衰草匝空池
盤進青精飯行歌白紵詞
峨峯何處所匹馬夜中馳

大梅山

獨憐僊子宅偏傍楚王宮
十月清霜下千林落木空
石門峯列戟丹井氣流虹
乘興尋真去花源杳未窮

次韻霞輿寺二首

夜尋湖裏寺朝上洞邊亭龍象盤僊界烟霞列畫屏
波涵一水碧天插萬峰青偶爾乘槎去疑窺織女星
曠望渾無際乾坤合此亭水澄銀作鏡山擁玉爲屏
歲月遊將倦塵沙眼獨青法堂輝燁處疑是少微星

生日

初度逢今日蹉跎閱歲華一官寧報

主多難且還家庭展班斲袖尊迴棠棣花明燈對長
夕亦自慰生涯

海會寺

郭西稱古刹鄰並足幽尋水樹縈相抱龍蛇迥自吟

移舟冬日靜聽梵暮堂深去住真無定安禪自會心

謁張文定公墓六首

雄峻三朝彥淒涼一墓田草烟迷夢蝶霜月老啼鵲
神想來歸日心悲死別年典刑時論屬那忍誦遺編
少日才能劭中年宦始伸詎知留鑰地翻作夢楹人
霖雨孤群望楓楸護百神易名沾帝錫優渥冠儒臣
悵自玄堂閔俄驚物色新冰霜勤餞臘猿鳥暗催春
天上長遊處人間未老身椒漿堪一奠淚灑北邱塵
及門懷夙昔高誼結深知儒脉千齡寄雲程萬里期
陸沉驚白首蓬轉負清時何限牛山恨還同梁木悲

徙倚千峯裏，泉臺黯不開。
鶴歸人獨遠，龍卧月仍來。
天地逢多難，雲風藉上才。
誰能會此意，落日動悲哀。
歲暮山容寂，天寒野燒空。
白楊迷古里，玄霧鬱深宮。
節序侵尋後，幽明隔絕中。
那堪宋玉思，搖落賦秋風。

龍虎山中懷萬叅政懋卿

尋真何地客，杖屨阻深期。
洞府初過處，中峯獨對時。
雲連異國日，草動隔年思。
他日逢僊訣，還應寄爾知。

送友人還閩

相送暮春前，相看思惘然。
浮雲滄海路，落日楚江舡。
去住又千里，悲歡共幾年。
何時逢便鴈，書到碧鷄邊。

沅州聞征南報罷

終歲兵戈劇誰堪困憊情

君王收上策將士罷南征地轉陽和脉天流歌頌聲
寄言謀國士無必請長纓

老君關

石門通一線棧嶺俯千峰立傍烟霄近回瞻山海重
蠻音交楚蜀風候襍春冬安得青牛駕遙追僊客蹤
辰溪道中

行行窮楚塞望望下滇池節候逢三月烟烽隔九疑
雨沉青草瘴水漲綠雲陂壯志存弧矢臨岐一賦詩

曲靖待汪直齋叅政不至

共有之官約翻然消息虛欲憑南下使還寄北來書
風雨孤城畔關山萬里餘吏民懷舊德久已候公車
訪潘石溪少叅

天涯今日路重喜故人逢風雨年來夢江山別後容
看花臨曲檻把酒對千峯興洽停迴騎高城起暮鐘
得朱鎮山同年書

故人昨歲別春至一書來夢裏音容見愁邊懷抱開
雲深冀北路春老越王臺潦倒今如此乾坤孰愛才
送蕭子入覲

霜日靜河津乘槎上北辰衣冠萬國會簿領十年人
樂聽釣天近恩沾湛露醇還聞奏殊績風采動臣隣
贈楊侍御以謙

南省含香舊西臺執法行昔賢懷激烈此日重才名
攬轡匡時略牽裾報主情素餐還愧我漂泊海西城
贈陸吉士惟安

才英羅四百

帝簡屬深知待詔趨金馬抽毫傍玉池激昂孤史職
偉麗馬卿辭壯觀知多少能孤聖作期

贈袁進士世顯

天街放榜日意氣羨君雄袍映宮羅綠尊分御醪紅
看花杏苑裏列籍禁門東感激酬

明主徽音嗣祖風

戲贈人問期和竹墟司馬二首

坦腹誰家客丰咨玉雪光錦屏曾中雀珠樹欲棲凰
夢入巫山迥思隨湘浦長畫眉應不惜元是漢張郎
想像仙姑秀同心百歲盟自憐猶爾爾相見定卿卿
烏鵲橋邊渡蓬萊海上城佳期知不遠紅葉漫傳情

次韻夏夜同竹墟東沙集莓厓宅四首

曲巷停車地華堂列席年坐深花炬簇興洽羽觴傳

斗隱高城樹風澄瀚海烟誰能賦招隱彷彿小山篇
海甸兵戈日淒涼異昔年却憐今夕酒仍對故人傳
庭曠低纖月城虛入斷烟有懷餘激烈彈劍奏新篇
開軒逢首夏散髮憶當年醉裏銀河轉吟成玉漏傳
襟期同海岳世路隔風烟他日還容我長歌白石篇
德星頻報聚夙望屬同年榻自論心下杯緣樂聖傳
嚴城喧暮杙幽徑逗春烟倚玉慚非偶難賡大雅篇

集東沙宅用前韻三首

客路風蓬轉差池易長年幸當龍劍合詎待鴈書傳
逸氣真衝斗飛談欲沸烟昔賢何意緒獨賦四愁篇

凱風迎律至結束慶韶年日晏庭扉寂天晴鼓角傳
深杯浮湛露暗柳拂輕烟金谷休同罰詩成牘有篇
梓澤留懽候蘭亭暢飲年風期隨代遠心賞到今傳
鐘送千門曙燈銷九朶烟職思知有在不藉國風篇

集竹墟宅用前韻三首

星車迴故里荏苒屢經年懷抱愁中賦尊壘病後傳
花林微過雨竹戶澹生烟好待重關啓歸成馬上篇
極憐芳日晏翻憶賜酺年僊樂雲中沸露盤天上傳
騎歸燕市月珮染漢宮烟寂歷滄江暮虛稱既醉篇
司馬懸車日姬公避位年蒼生四海望丹詔幾時傳

醉卧溪林月閒耕隴畝烟無將今夕意寂莫付詩篇

和東沙中秋後八日集陸宗叔精舍二首

轉眼佳辰過追懽神衆賓明河低拂席遲月暗留人
杯湛金莖色堂流玉麝塵他年還卜築從爾結芳隣
久抱尋真興招携忝上賓琴尊一夜會湖海幾年人
樹隱寒城漏風澄近郭塵未須論去住心賞即爲隣

次日集陸和叔宅用前韻二首

結宇臨湖曲烟霞共主賓偶逢投轄夕聊伴放歌人
水淨天爲鏡臺虛霧作塵留懽情不極寒月轉西隣
故鄉憐聚首况復島夷賓隱隱風鳴杵纖纖月趁人

醉翻銀燭影歌鼻盡梁塵猶憶青陽侯頻過託近隣
莓厓邀遊虞氏山亭即席次竹墟韻二首

久慕芳園賞初逢勝侶招徑迴城樹合峯靜海雲遙
叢菊迎秋放幽禽向晚要豪吟慙寡和知是郢中謠
草閣臨城起相過亦壯觀穿林窺窈窕坐樹俯噴吭
細酌清秋興高歌子夜懽何時謝簪綬從爾更盤桓
春日集城南僧寺次韻二首

近郭推名刹欣當載酒辰溪橋行處合烟柳望中新
宛宛鶯求侶輝輝日向人塵機從此息蓮社許相親
梵宇盤空起林開忽見花風暄饒鳥雀地古積烟霞

對酒川原暮移舟草樹諱不知人境外何處更僊家
聖旦

萬壽中秋節千官子夜朝天移龍虎輦風引鳳凰簾
殿啓金鐘動簾迴寶扇飄華封還有祝歲歲獻神堯
懷林亞卿熙載

一別烟郊暮空亭颯早秋却思明月夜何地接仙舟
山海余多病風塵爾倦游好將初服意携手向滄洲
夜發湘山

乘月下南亭方舟泝遠汀波涵灘水白燒入楚天青
夜久風逾爽秋高露倍零不須論物役吾意已沉冥

楊花

駘蕩春光裏，垂楊滿故枝。
迎風花欲亂，裊露態逾遲。
迴合成千里，飛揚自一時。
漸看霜節近，零落詎須悲。

望居庸

星棧倚天都，邊烽暗五湖。
城臨青海斷，河抱玉關紆。
風柝凌秋急，霜笳伴月孤。
誰言漢飛將，早上北征圖。

遲雪

雨雪漫漣漣，窮年煖更饒。
不妨冬令弛，祇恐太陰驕。
草樹偷春動，烟雲向夕飄。
玄皇如可問，矯首佇青霄。

秋懷

我亦悲秋客能堪楚上居夢牽鄉路有病益窄情踈
積水空城閉寒天落木虛欲知彈劍意不是爲無魚
行次衡陽贈劉明府

客路少知己臨岐倍愴神那知湘水上仍對故交親
月爲留尊出花催放棹頻已看漸騰躍莫自怨風塵

初發家

秋至散層陰天關望不深還將投筆意聊慰倚門心
朗月吞滄海微霜淨遠林總怜鷗鳥意來往自浮沉
留別王子長

明時同負謗獨荷主恩優別向燕關道愁隨江水

流家隣在客里花遍羽人丘何日尋真去相將續舊遊

吳江夜行有懷

輕舟乘夜發宛轉出江間遠浦寒蕪靜疎林倦鳥還
霸圖千載歇塵世幾時閑遙憶空山侶秋深獨閉關
送包庸之赴長蘆

冀北古滄洲分符愜壯遊馬衝三輔雪帆轉九河流
地迥截鮫室天晴見蜃樓他年論煮海不愧古人籌
送王令之閩

旌搖班馬鳴別調咽新聲以我一杯酒送君千里行

海雲蟠月白關樹接天平待到停鳬日春風滿地生
冬夜謝山人茂秦偕許憲使子春見過得春字
積雪遍城闌當杯興益新風萍一夜會騷雅百年人
月隱高城暮梅占上苑春漫將飛動意漂泊向風塵
雪中茂秦過靈濟宮

天街飛雪急高興滿仙關路想桃溪轉山逢桂樹攀
鳳簫乘月度鶴馭幾時還玆重新詩句流傳三輔間
夜集丁羅諸子得杯字

雪後復筵開時逢二妙來他鄉同是客勝日幾啣杯
庭曠天河入春遲曉漏催栢梁如有賦會見出群才

東茂秦

城南十里寺洞壑俯清幽
偶爾探竒去居然聽法留
雪深丹闕路春漲王河流
惆悵心期隔冥冥何處求
除夜

岑寂江南客蹉跎歲序侵
斗杓天上轉宮漏雪中沉
湖海他年計乾坤此夜心
空然對尊酒徙倚帝城陰
人日章行人景南偕茂秦
子春小集得明字

共怜人日好獨占早春晴
苑樹含風細河流帶雪明
交情逢駐馬節序候啼鶯
莫惜金尊倒長歌海月生
十日丁羅諸子偕過

長安餘積雪窮巷坐沉淪何意探玄侶還爲下榻人
鴈迷燕市月漏逼漢宮春後夜期三五相過莫厭頻
十三夜集子春宅得星字

上國元宵近嚴城敞不扃烟花留夜月火樹雜春星
苑外龍輿度雲邊鳳吹停賞心還未已吟眺倚青萍
和江夏趙博士懷川蜀故居四首

風流江夏士家世本西川跡慕龐公隱名高宓令賢
趙曾爲令草齊三楚路雲斷九疑天何限思歸興遙飛落

照邊

先朝饒俊達爾祖最稱才麟史紉蘭室葩章掩栢臺

坐驚霜節改愁聽暮猿哀光大曾孫事頽波挽欲回
望鄉何處所臺壓楚峯低盡日長江下何時獨棹西
松丘荒蘚合枌社亂雲迷萬里橋邊柱需君拂舊題
謫居滄海上直道幾人憐騏驥遠千里鵬鵬望九天
年華空白髮宦況且青氈他夜巴山月依微入夢懸
龍慶寺

一徑入珠林群峯紫翠深壇空馴鴿下風靜亂蟬吟
隱几便高卧清齋長道心懸知名勝地長夏足登臨
定慧寺

有虎跑泉

野寺空山裏幽尋愜素期門臨鳳舞地泉憶虎跑時

市遠烟霜積春餘草木滋賞心知有託歸騎轉應遲

六和塔

孤塔聳層霄登攀路不遙山圍吳子國江落伍胥潮
聽梵潭龍出懸燈海日搖蒼然當夜半信有桂花飄
江上聞鄴衢失守悵然有作

戰血昏滄海驚傳夷寇饒輕兵乘兩夜利舸逐風潮
一旦軍容損頻年士氣驕祗今籌略者誰似漢嫖姚
防秋

防秋當此日國計轉蹉跎歲輓輸邊盡天驕入塞多
丁男徵六郡甲馬駐三河安得貔貅將功追馬伏波

贈萬總兵民望

磊落雲臺彥經年水國居遺榮希賀監多病似相如
客至嘗懸榻家貧只著書傳聞青海北待爾駕長車
夜往武夷

靈山遙入望逸思渺難禁曲蹬穿雲上深溪截路尋
風喧妨過虎月上候鳴禽漸覺仙宮近飄飄笙鶴音
神佑宮露坐

琳館坐來清壇空碧月明九天涼露下萬壑暮雲平
王女飛鸞珮仙人奏鳳笙分明塵世外別自有蓬瀛
沉九曲

宛轉溪頭路微茫一線通迴波倒映日疊嶂曲盤空
人世黃塵斷仙家紫氣通何因驂鶴馭萬里去乘風
道士出仙顱朱光奪目云當大貴

仙骨何年蛻流傳尚此宮神遊三極迴氣壓萬峯雄
乍見泠泠碧徐窺炯炯紅道流渾錯擬吾意豈三公

興田驛見亡友陳約之屏間之作追悼二首

少日同袍侶淒涼何處遊徒聞隣罷杵不見壑移舟
極目荒山渺傷心逝水流誰堪孤驛裏詩草至今留
迢遞閩南路曾經按節過風烟一逐客天地幾悲歌
楓落秋原早猿啼晚月多不禁回首地雙淚對滂沱

建寧道中

候曉促鳴騶行行出建州懸厓盤鳥道曲水隱龍洲
天遠星辰隔秋遲瘴癘浮當年弧矢在詎敢慕夷猶
入延平懷東洲屠尚書兼寄竹墟中丞時有麻
易之後

鄉國饒英達尚書望最崇立朝今魏相領郡舊吳公
政治與人頌才兼國士風因聲問小謝何日奏膚功
怯暑

夙畏朱方路胡然觸熱臨分符明主寄攬轡古人
心觸水龍孤立攀條猿競吟何當尋玉井蕭洒滌煩

襟

山陰道中

夜出山陰道蒼茫雲水多舉杯邀海月掛席近星河
浪迹思安石心期愧伏波榜人如會意時唱芼羅歌

江中對月

江路中天月羈人獨夜舟
蕪葭臨水靜河漢傍衣流
影抱蟾蜍滿香含桂樹幽
金波看
不定真是弄珠遊

分水嶺

乘高力已痛立馬且踟躕
地勢橫吞越溪流半入吳
雨沉候火暗風捲戍旗孤
爲問關門尹還逢紫氣無

舟發蘭溪乘新漲暮抵錢塘

江溜急奔雷舟行擊榜催稍過嚴子瀨忽到越王臺
日月中流見河山四面開賞吟情不極况復故鄉回
送王尉赴高淳

華邑輔神京憐君捧檄行春遲津柳細雪漲海門平
地僻逢迎簡才通佐理成應知入幕處風度似鄰生
簡包庸之

聞君嘗卧病兒女苦傷神坐覺青陽改行看白髮新
古今同逆旅湖海一閑身不見蒙莊叟逍遙脫世塵
席上懷梁大用

小築傍城陰追涼坐正深汀花留晚照谷鳥作春音
未遂遊仙願聊清避俗心不知同社客憂病故相尋
挽蕭復初

不盡朋交意其如淚自潛年華餘白髮身計付青山
天地虛無裏雲風慘淡間生芻須一薦英爽倘來還
夜投永明寺

梵宇壓城雄行遊夜正中輕烟流鳥道華月滿龍宮
坐覺諸天近心持萬法空猶然問慧遠蓮社許誰同
宴張子受憲使南園值治橋

春服思飄飄南園屬勝招危臺低見日曲澗細通潮

名忝登龍會情看結駟橋直須酬酩酊深夜發蘭橈

題園

早歲羨投閒爲園學閉關地偏饒白鳥堂迥納青山
天地冥心外風烟醉眼間相過幾羊仲竟日未言還
席上酬沈章山向懷葛陳海洲張龍山諸君得
花字

偶來逢勝侶春賞到僊家地迥千峯出城廻一徑斜
題詩臨水竹把酒對鶯花可少王猷興他時一沆槎
次韻酬張守夏飲達曙二首

高院晚來涼開襟向北堂門臨山月白樹接海天蒼

金縷盤雲細銀缸映日光
喜看烽燧息南畝足耕桑
共憐河朔會深坐不知疲
水氣含風爽棠陰接地垂
物情雙對局身世一御卮
已報東方白無勞詠露斯
送外弟毛光祿元之

春樹引仙舟春江澹不流
相看萬里道暫作一尊留
湛露調龍鼎清鐘候鳳樓
北來芳信早端慰倚門愁
送張序班子用

京國青霄上看君報命還
烟花迎去節風日破離顏
爐裊金門直鐘催玉殿班
風流歸賦客逸駕許誰攀
贈翟教諭之信豐二首

念爾移官去蒼茫梅嶺端春風仍絳帳炎日且征鞍
暫喜過家便休嗟行路難夜來看劍氣南斗共高寒
虎城環四省往歲忝提兵祗仗攻心術翻貽玩寇名
餘生緣聖主孤抱質神明爲謝橋門彥乘時聽鹿
鳴

題張令祠四首

楚楚西安宰流風邇往年牛刀驚小試驥足謝孤騫
興似河陽勝名同單父賢何期淪落早惆悵使人憐
地下脩文日民間墮淚時星垣沉灝彩棠樹寄遐思
化已推三異清猶頌四知傳言百城吏風彩是吾師

每讀循良傳因知曠達心行將琴畔鶴死乏橐中金
逝水空天地浮雲自古今報施歸令子計日作商霖
傳聞清獻里今有令公堂遺像風雷護穹碑日月光
清漿過楚客頽壁笑徐王我亦崇休烈招魂意不忘

天閣集卷之六

天一閣集卷之七

四明范欽安卿 著

集竹墟宅限韻四首

避暑何方好逍遙中散林風花醒醉眼泉石寄遐心
偶以巾車暇來聽山水音未須催早發入夜見龍吟
鳴雨炎天到涼生檜栢林傳觴豪客興投轄故人心
月破高城暝風飄遠市音祇憐佳勝在長日伴幽吟
竭來城市內別自有山林浩蕩浮元氣幽虛長道心
人疑上皇世絃是太和音稍待涼秋候還來翫月吟
我愛餐霞客孤高江上林竹風疏爽氣蘿月湛幽心

棋賭東山局詩聆清廟音所嗟非綺皓空和紫芝吟

依韻奉酬竹墟二首

高人何處尋早歲結雲林一脫輪中鞅彌清物外心
興來招白社酒罷撫瑤琴不學隆中叟淒其梁甫吟
讌賞日相尋輸君玉樹林烟霞元舊侶金石况同心
盤進青精飯絃揮綠綺琴巴歌常入聽誰似郢中吟

九山招飲南莊病不克赴三首

咫尺城南地相將景物幽蕭蕭蘋際籟汎汎水中鷗
露下青丘暮風高白鴈秋文園今卧病惆悵獨搔頭
延覽何方好風流學士家雲藏深谷徑桂放小山花

倦鳥投林早，游人爭渡譁。空憐張博望，銀漢攬仙槎。
春賞喜來茲，蹉跎秋半期。輕颺搖獨樹，華月匝清池。
步屨尋僧慣，開尊對客宜。何時酬雅興，商嶺共餐芝。

中秋翫月

華月中天滿，流輝徹夜闌。喜逢佳節至，况對故園看。
桂歛窺金鏡，波澄漾玉盤。猶疑最高處，風露不禁寒。

代送張惟本之豫章二首

蕭洒薇堂彥，秋行指豫章。嶽雲開霽旭，江雨薦新涼。
問俗褰帷遠，憂時攬髮蒼。他年程異績，隨地有甘棠。
猶記當年別，書來自武昌。林居餘白髮，天路想清光。

又向西江去其如瑤草芳登臨足詞賦投寄莫相忘
中秋後四日飲東沙宅和竹墟二首

共候青天月虛堂綺席開光從前夕減興自隔年催
露砌鳴蛩細風城旅鴈來不妨傳玉漏枝轄正深杯
湖上烟霏淨霜前海月遲病懷常廢酒却赴尚書期
勝擬庾樓並名慙謝賦竒霓裳何處度縹緲近瑤池
聞竹墟悶坐有作四首

雅抱稱竒曠秋來何未開昔賢常負俗天意竟憐才
漫下楊朱淚空深宋玉哀不聞荷鍾者終日只啣杯
冉冉青陽逝蕭蕭素髮新古今俱逆旅天地一畸人

靜見雁飛遠幽僻魚鳥親那堪恤緯意深坐獨傷神
滄海浮雲暮空林落木秋往來百年內誰作放懷遊
厭事日多事却愁心轉愁不如兩棄置汎汎任虛舟
涼秋天宇淨華月對嫦娥吾已踈往來君如浩嘆何
且希玄豹隱重和紫芝歌試問道傍客黃梁夢幾多

送楊總兵二首

仗鉞事專征元戎最著名何期投行至翻速掛冠行
海國星霜過天王日月明賜環知有詔早晚下承
明

高隱從何地孤胥山水鄉岸風秋瑟瑟江月曉蒼蒼

世路看棋局心期寄野航獨憐雄劍在中夜望樓槍
濟上遇趙元實尚書

星履來天上開心話舊遊我行猶北闕君意且滄洲
霜鴈河關暮風笳驛路秋五湖烟景別何日共扁舟
題夏大尹海橋草堂

君家何處住遙在海橋邊海認桑田日橋傳駟馬年
青天餘斷岸斜日澹孤烟聞有蒼龍卧時來兩八川
龍泉山閣宴

草徑荒烟合巖扉霽旭開深春纔一到茲興亦悠哉
臺觀憑城邑江山入酒杯白鷗如有意渺渺逐人回

中秋前四日邀諸公賞月因汎舟次東沙二首

皓月中秋近流輝覺漸多盈盈開玉樹緲緲映金波
庭促呼盧席湖喧鼓枻歌相看不酩酊其柰賞心何
勝地誇三島移尊故有期迎秋天已湛入夜月偏奇
暈合河山影香紛桂樹枝停杯幾欲賦慚愧謝莊詞

再次竹墟二首

西堂秋晏合湖月欲舒光坐待林霏靜來乘水氣涼
杯搖疑兔影衣染覺天香城漏休言促沿洞興轉長
霄闌華愈吐上客且留懽欲悟身爲幻何辭醉不冠
銀河天際沒玉桂露中寒便擬乘槎去支機取次看

次韻中秋集全九山司空庄居觀競渡二首

勝事逢佳節何緣出郭遊雲峯迴曲磴亭榭俯中洲
地蹙龍蛇動波翻日月流不妨鳴雨至幽絕自堪留
焚魚稱此地秋賞欲何如破浪烟中舸張筵石上蘿
醉來天地窄吟罷水風多明歲當今日能無載酒過

十七夜集竹墟宅二首

月賞當今夕杯傳不厭頻清輝猶戀闕靜影故留人
坐覺中天近歌憐子夜新興來還擊劍何處有風塵
列坐神仙侶開襟攬勝遊綵雲迎管駐華月傍衣流
林迴迷鳥鵲庭空下斗牛誰言天欲曙吾意且淹留

悼上饒馬節婦二首

早歲即孀居侵尋七十餘無因歸別鵠有恨泣枯魚
優詔當朝典脩編太史書獨憐猶子意

仲子鑒時為博士

薨

薦幾停車

芳聲傳四國誰似紀姬賢苦竹霜爭厲貞心日並懸
愁聽蒿里曲忍誦柏舟篇聞有連枝樹淒涼遶暮田

詠紅白鷄冠花各一首

傳是仙丘種移栽越客家纖葩輕弄日密艷細蒸霞
抱影羞丹鶴纏頭擁絳紗何時堪一叫醒夢在東華
愛爾瓊華好交加水石傍心期甘皓首結束謝紅粧

近月還迷影迎霜欲吐光
寄言桃杏伴何意近春芳

用東沙韻屠國泰慕雲莊賞菊二首

草閣臨溪上重來汎菊觴
酒矜干日釀花歷九秋霜
詎減登臺興何須落帽狂
景陽詩力健誰復擅詞場
共愛東籬菊軒然殿物華
名齊彭澤品勝壓洛陽花
接席瓊垂雪當杯紫汎霞
不知人代裏金谷屬君家

答外弟黃資禮僉憲

病身常謝客一似茂陵居高誼
真憐汝新詩會起予
松風疏枕簟蘿月靜琴書
便擬乘幽興扁舟縱所如
遠俗

遠俗甘淪棄深居學閉關經時雙鬢改多病一身閒
掛席思滄海移文謝北山春來軒冕客江上幾人還
九日登樓懷許子春林熙載朱惟平傅觀家諸
同年

佳節崇樓上徘徊思獨長江流低盪日塞鴈急隨陽
白髮羞欹帽黃花笑舉觴同時霄漢侶漂泊在何方
題湛湛清波卷贈徐節推

同說空陂水相將滄海陰陂開千頃量水湛百年心
路有青天頌門無暮夜金他年作舟楫端在鳳池潯
簡九山生日出居阿育王寺二首

杖屨何方去蒼茫雙樹林人天開覺路法雨淨幽襟
野曠冰霜合峯迴紫翠沉遠公期入社端候虎溪濟
地擁金仙界風流學士船衝寒綠避客攬勝且安禪
人世空山外年華短髮前不知同社友形影坐相憐

林中

弱齡期學道荏苒二毛餘世路何爲者林居常晏如
不煩招隱曲已廣絕交書好似於陵子臨園日灌蔬

閒居

謝病掩柴門深居僻類村危途存犬馬醒眼對乾坤
有覺言俱廢無營道自尊沙鷗渾解意接席不聞喧

送劉參軍

春日長沙路憐君解佩還壯心餘白首舊業有青山
望入巴江迥愁連湘竹班興來堪作賦屈宋許追攀
野行即事

步屨西成候田家樂未央鷄豚紛布野禾黍早登場
賽社喧金鼓呼隣勸酒漿年年逢大有帝力總應忘
溪隱莊

深溪藏跡地名勝是桃源老檜遙盤徑青山直對門
春來花競發雨過水初渾鄰父能相訪幽期欲共論
送馬學諭天鑒令靈川二首

剖竹共新命西行赴桂林江空衡岳出秋老瘴烟沉
鳧送王喬舄堂揮宓氏琴風流千古事心賞到于今
邑博如君少才名衆所誇青氍毹辭海微墨綬領天涯
路出三湘樹門停八月槎嶺頭逢客使珍重寄梅花
贈金廣文轉建始兼訊少巖傳司徒二首

風壤接衡巫君行愜勝圖傳經尊舊業視篆重新符
怒峽霜前殺吟猿月下孤經過武侯廟不惜奠清醑
休矣吾同榜才情海內稀已膺宣室召何拂杜陵衣
世路同漂梗讒言隱伏機憑君一寄問莫遣壯心違

芳草遍汀洲王孫何處遊
感時裁楚賦把酒憶吳鉤
遠道鱗鴻隔華年日月流
相期黃菊候一爲理歸舟
乾嶺

崇嶺錫山陽躋攀思緲茫
千峯攢馬首一徑繞羊腸
地迴天浮水崖深日避霜
分明昔人訓遊子戒垂堂
再經寶林寺

幽谷結招提重來徑不迷
花仍含露笑鳥故向人啼
積水明霞外千峯落日西
無心耽歷覽虛寂保天倪
聞葑厓中丞候代廣信

久理東歸棹何緣會面難
旅魂當夜急鄉客入秋寒

月暎湖波綠風飄桂子丹一尊期共賞莫待歲華殘

用韻再簡萼厓

拍珮逢清世真傷直道難隋珠淪寂莫豐劍動高寒
讒口紛誰白君心炯自丹獨憐吳楚上無日起凋殘

秋日鬱孤臺

斜日滄江上憑虛倦眼開時危常撫劍秋盡始登臺
霜重丹楓暗雲間紫鴈來故鄉緬何所延佇首重回

秋日集資禮山樓

我本逃名者何當結社時乾坤堪一笑塵海漫多岐
霧樹深藏閣天香暗下墀總憐投轄意深夜倒金

積雨

積雨失朝昏江門勢欲吞濁流溪漳合高岸幾家存
濕鳥頻移樹寒花寂倚垣無人相慰藉搔首竚前軒
簡全九山司空

肺病何因得令予日夕思論心能幾友伏枕且經時
花鳥青春思琴觴白社期祇應捐物累瞑坐荅無爲
汎東湖

澄波四望空盡舸泝冷風野寺輕鷗外人家細雨中
菰蒲臨水暎洞壑與天通卽擬尋真去花源杳未窮
東山道中四首

城居苦輪軸屢發看山心不泝川原遠那知烟霧深
移家宜谷口鼓枻似山陰田父時相值猶然擊壤吟
客路蒼涼裏禽寄故故來看碑頻下馬訪古獨登臺
玉粒和雲種卮葩拂霧開不知人世上何地更蓬萊
級石穹厓上穿雲絕壑邊路迷常問渡松老不知年
望望峯巒出依依魚鳥憐黃冠何必乞早已賦歸田
落日欲黃昏凄清投遠村樵歌紛竹徑烟火接柴門
露下蕪葭靜風生鳥雀喧轉憐神景會勞憊詎須論

宿葉氏

青山與不極偶憇野人家獨徑澄湖繞空林落日斜

解衣園水竹炊飯進胡麻幽意從茲愜前峯月正華
金文寺

三生結勝緣猶憶十年前水月金沙界香燈繡佛筵
迷津初假筏靈境遂忘筌去住何須問長看法鏡懸

隱學寺

獨坐空山裏荒碑大道邊墟迷栖跡地池憶放生年
亂篠含風整寒花裊露鮮無能留寶帶空爾學逃禪
九山碧山莊

始循垂柳堰湖水接天開旋過焚魚里悲風動地來
物華一以變塵世通相推不待雍門奏牛山自可哀

入寺

息馬投空界披襟對夕曛
澗留太古雪窓度上方雲
歸鳥連天杳疎鐘帶月聞
真詮無用覓已覺遠人群

出寺

涼露泫高松陽鳥上海峯
徑遙蒼澗繞山暝白雲封
有興調馴鴿無心制毒龍
明朝又城市惆悵碧山蹤

病居辭屠國泰西莊賞菊并簡張東沙屠東涯

竹墟碧泉二首

十月清霜候黃花作意開
無能同泛竿空復想登臺
映燭神疑炫臨風興轉催
明年當此際載酒故須來

吾愛屠公子心期不可攀
開尊希北海采菊對南山
謝傳追隨裏膏家伯仲間
還應娛大阮深坐竟忘還
再次東沙二首

菊圃重張宴雲莊久定居
不因邀翫賞那得到階除
就席花爭艷移尊興益舒
獨牽衾枕累延想秣踟蹰
小徑緣江轉寒花靜草堂
中宵催羯鼓曉日展霓裳
影透全消霧香凝欲待霜
何因接高詠中夜促飛觴
送呂中甫

風日暢新晴逢君海岱行
客程催去騎鄉思劇啼鶯
琳觀周群望丹霞接五城
安期如可攜携手脫塵纓
天一閣集卷之七

新春集資禮宅值生辰

青陽初改律物色競暄妍對酒憐同社懸張憶往年
池波低漾日砌草澹生烟投轄何須問風流幾昔賢
問包庸之疾

不見包何面踟躕獨悵予絕交疑叔夜卧病似相如
江草春將動城雲日自舒何當臨畫閣相對攬清虛
和東沙元夕後二日燕竹墟園亭

共有憐春興言從金谷來苑風齊放柳海月迥臨臺
調入梅花奏香浮竹葉杯勝遊寧有幾深坐合徘徊
次日燕東沙山亭即事

初過宣陽青山堂復此招虹梁遙架漢鳧沼暗通潮
醅出仙家麝香傳遊女綃留懽不覺晚華月度林標
丁卯除夕和東沙三首

守歲當此夕相將爆竹同鴈聲俄向北斗柄迥移東
世路滄江久年華白髮中無因駐短景留興待春風
物候憑誰換淒然動我思有懷慙曠代何術荅明時
地僻雪猶積江寒梅較遲妻孥堪遠座中夜一傳卮
未老即縣軍蹉跎歲屢除邊烽時極目朋舊幾傳書
涉世身偏嬾謀生計轉踈祗應披短褐長釣越江魚

秋日閒居

閒居仍作賦終日掩荆扉九月清霜下孤城白鴈飛
耽書吾道在彈劍故情遣翻笑鑑湖客頽齡始拂衣

卧病

蕭颯嚴霜候江鄉並授衣馬卿猶卧病陶令早知非
草砌鳴蛩亂柴門過客稀未須勤藥裹冥寂得真機

病中酬竹墟

未是文園病重勞長者車霜風三徑裏衾枕九秋餘
防客頻題鳳呼童欲饌魚興闌聞竟返搔首立躊躇

酬東沙

高人常避俗近况復何如不爲憐同病那因數寄書

風砭當夜急霜植入秋疎兀坐時延佇徒慙菊賞虛
酬包明臣李賓甫

偃仰高秋候淒清兩鬢華獨煩詞客念重過野人家
鴻鴈深投渚芙蓉爛放花相憐不相見咫尺似天涯
黃資禮燕會病不赴

念爾仍高會逢予正杜門天秋沙草歇風夕塞鴻繁
興想東山局愁牽北海尊三時稀見面幽緒共誰論
酬周廣文

伏枕違朋好淒然感物華秋聲連蟋蟀霜意靜蕪葭
未下迎徐榻空迴訪戴槎何時堪倒屣一與吸流霞

題沈郡丞蓮橋草堂二首

石梁高不極，烟水四時新。
源竇疑無地，林迴別有春。
星邊題柱客，花引蕩舟人。
已覺心期暢，何勞更問津。
多君懷曠達，來往日湖偏。
勝蹟留驅石，清歌動采蓮。
亂峯新水外，孤艇夕陽邊。
幾欲尋真去，塵蹤自可憐。

大慈寺二首

寶嶂千盤裏，龍宮一鏡開。
雲間僧獨住，秋老我初來。
紅葉橫霜砌，青蓮抱石臺。
相看神慮寂，諸品總浮埃。
世界接人天，旼依了夙緣。
溪林迴晚照，鐘磬發秋烟。
說法周三會，冥心證四禪。
獨憐惠遠意，能過虎溪前。

簡纓泉友作

名園成獨往聞在郭門西
春至花全發風生鳥亂啼
興來堪鼓枻酒罷更留題
可似天台路徒令到客迷

酬屠國泰賞菊不赴二首

肯負看花約羸軀病未能
興從今日減賞憶故人曾
漉酒虛彭澤哦詩感杜陵
時來還綺錯雕檻定須凭
節屆初冬候中林颯以寒
不知栗里上猶有菊花看
霜氣深浮竿風情獨倚欄
寄言同社客留興好盤桓

送霍令遷南僕丞

雪日蕩晴湖西行興不孤
雲霄新使節天苑舊

皇都江送凌風鷁庭留上漢鳬
君王罷遊獵八駿未須圖

簡謝慈簿二首

經時不見面漫訝尺書無老去心常嬾秋來病始蘇
彈琴當絕閣捲幔俯晴湖簿領何須計風流亦大夫
憶秉閩臺憲炎風走傳車山川一爲別故舊幾栽書
穎脫真逢汝巖棲且慰予猶聞持苦節庭戶見懸魚
資禮宅對雨二首

靈雨如期客飄蕭傍午過苑畦爭破塊庭留欲成河
淨入江山迥神回草樹和好憑僊艇去高枕聽漁歌

憐君多雅興勝日共傳觴有雨來東郭隨風灑北堂
寒聲連水竹涼思徹衣裳此夜巫山夢寧須羨楚襄

寄周廣文

嗟君啣命去轉眼及秋深賦擬投湘水身猶客武
林風塵數口計江海此生心聞有留賢疏何時定好
音

送汪脩伯遊吳

玉露淨江天風旌落日懸思深彈鋏候名重棄繻年
山水三吳擅聲華六代傳歸來成論著可少馬卿編
池館小集限秋霜二韻

高軒能見過對月且攀留影澹銀河夕光涵碧宇秋
山空桂盡發霜降潦初收肯惜年年醉親知幾白頭
年來常謝客秋至一傳觴華月中天滿流輝夜未央
金波微映漢王杵迥含霜知是高陽侶酣歌意轉長
十五夜集資禮山館二首

月賞今秋劇無如此夜圓漸看離極海忽訝到中天
沉醉青尊裏狂歌白髮前猶聞可憐處遊侶去翩翩
待月頻移席吟風更倚欄漏聲花外斷酒氣露中寒
鴻鴈爭南下關山直北看已知投轄意不復慮更闌

又限韻

嗜酒似陶潛詩豪老更兼商飈初按律滿月正當簾
庭靜天香裊更深露氣嚴不聞熙代事醉客尚厭厭
八月十九日竹墟園亭賞月分韻三首

金谷追歡地相看興未涯笑迎滄海月來對小山花
暈抱珠胎潤光啣玉鏡斜好同張博望萬里攬星槎
天際對嫦娥誰言三五多寒光浮几席灝氣逼星河
遠寺清鐘斷高城獨鴈過百年渾易邁不飲欲如何
清賞中秋過相邀復醉吟候蟲喧古砌涼露濕中林
牢落經年病追隨此夜心當關休詫問朗月在高岑
東沙招賞菊不赴奉荅

見說平章宅盈庭菊正花輕枝低拂霧繁朵細蒸霞
門豈停無騎杯還驚有蛇瓊瑤何以報悵望水雲賒

三月晦集萼厓宅

投轄逢烏府留春敞畫堂江山澄夕霽花柳競年芳
竹筍行盤艷蘭漿剖甕香

每厓自開甕

但令懽賞洽不必

似高陽

簡吳惟直

霜日肅高秋江山獨倚樓憐君常伏枕惆我欲移舟
一棹何年種滄波盡日流可誰通問訊獨鴈下河洲
八月八日燕竹墟園亭不見月

月晏不辭早其如此際何能雲乘暮候寒雨入秋多
倚閣躊躇思當杯寂莫歌開晴他夜事幾欲問嫦娥
十三夜集東沙山亭

湖上襟期好秋來得月偏門臨蓬島路人醉桂花筵
涼露寒高樹明河沒遠天不禁幽賞劇竟夕欲忘眠
十六夜山亭燕集東沙坐病不至

良宵期攬月留客坐山家澗壑初收霧芙蓉正放花
狂歌酬節序縱酒作生涯天漢疑無路空瞻博望槎
溪隱山莊

山居異人境忽漫杖藜來林鳥隨時換庭花作意開

流年雙短髮清世一凡材月出舒長嘯幽心亦暢哉
山中簡汪仲安

漫遊忘遠道晏坐得名山遙想餐霞客高蹤不可攀
丹楓深閉壑華月迥臨關徙倚無人識空林倦鳥還
西山道中三首

望望蒼山去澄波穩放舟興殊剌溪夜勝似石門秋
谷鳥披雲立汀花帶雨流已看塵世別何必訪丹丘
一入桃源路風情自可憐人家青嶂裏鷄犬白雲邊
賞合逢花駐狂堪藉草眠漁郎時借問不似避秦年
曠望蒼山畔依稀杜曲家流雲斷行跡幽鳥閑年華

餉青精飯林披金粟花何因脫輪鞅長得攬烟霞

贈徐太守靖甫二首

青雲天上客相見嘆蹉跎我已一丘足君如五馬何
心期餘鹿豕世路渺風波好盡尊中物臨風一浩歌
結廬叨近邑投誼屬通家一作都亭別頻驚歲月賒
青蠅空自點寶劍向誰誇欲悟盈虛理浮生信有涯

挽沈叅議母

名啓源二首

令母賓僊去遺孤擁旒行江山迴蜀道風雨暗吳城
碧草愁中思玄猿夢裏聲不知堂北月今夜爲誰明
馬鬣新封地牛眠舊卜阡路喧蒿里曲人廢蓼莪篇

逝水浮雲歇空山落照懸微音何處問太史有新編

冬晚赴竹塹招

風雨欲何之華林結社時憐君情不淺笑我到仍遲
歲暮群芳歇天寒獨鴈知徑須酬物色深夜倒金卮

姚繼秀母節壽

稱壽紛江國誰如母氏賢聲華彤管裏心行總帷前
懽慶逢今日悲涼憶往年欲知遊子意喜懼坐相牽

送呂中甫訪族新昌

問爾何方去蒼茫天姥西寒城一騎轉落日萬峯低
地古饒桑梓時清息鼓輦總多延攬意到處好留題

中甫至自新昌

長日卧蒿萊因君喜氣開
寰浮剡溪色賦擅櫟亭才
未即流觴去寧同盡興回
天寒紛雨雪深醉不須猜
中甫偕諸友見過

豈是高人宅仍勞結軫過
陳詩披月露把酒對山河
徑僻流塵斷陽回淑氣多
仙旌聞又發佳晤恐蹉跎